

## Corporaziun academica Rezia commemorescha ses 55. anniversari

■ (anr/gc) La Corporaziun academica Rezia a Friburg è vegnida fundada 1957 sco emprima e suletta secziun universitara da la Societad da students svizzers (SSS). Ella ha fatg atras dapi lu in svilup dètg different ed ha momentan in pau da sbatter per survegnir novs commembers. Ins ha in candidat, dus interessents, dentant era sustegn da giasts, dispensads totalmain e tut spezialmain da la presidenta da la Rezia veterana, *Barbla Etter*, da preschent assistenta da *Georges Darms*, professer per linguatg e cultura rumantscha, a Friburg. Deplorablmain ha igl uschia era dà uonn nagin nov commember per la Rezia veterana. Mo ina chaussa ha adina puspè gi lieu tar lezza. Prest mintga tshintg onns festivescha la Rezia ses anniversari. Quest onn èsi il giubileum da 55 onns. La radunanza ha decidì da far quai ed elegì in comité d'organiziun per al commemorar quest atun a Cuira.

La zunt engaschada presidenta da la Rezia veterana, *Barbla Etter*, ha allegà las occurrenzas da l'onn passà: Il di da famiglia si Lai, il pelegrinadi tradiziunal a Ziteil, la Festa centrala a Sursee – nua che *Adalgott Berther* è daventà veteran per 50 onns commembradi – sco era la

saira d'advent a Cuira ed il di da sport a Scuol.

En pietad è vegni sa regurdà da *Heinrich Dietrich*, Panaduz, mort l'onn passà gist cu el era veteran da la SSS, sco era da p. *Ambros Widmer*, Mustér, stà da l'entschatta davent in bun e fidaivel commember.

Il suprastant *Kaspar Joos* è sa retratg. Ses successur è *Daniel Simonet*. La cassiera, *Petra Fetz*, po preschentar bunas cifras. A la fin da l'onn 2011 aveva la Rezia veterana ina facultad da passa 10 000 francs. Tant quint sco il preventiv vegnan acceptads. Per il giubileum 55 onns Rezia è in import pli grond vegni concedì sco garanzia da deficit. Ultra dal giubileum stattan uonn sin program: Di da famiglia en la regiun da Turitg, il pelegrinadi a Ziteil e la Festa centrala a Brig.

La Rezia veterana è sa radunada venderdi passà en il grond stabiliment da l'enconuschenta firma *Würth* a Cuira. Là datti da preschent era d'admirar ina exposiziun cun ovras dad artists da l'impressiunissem ed expressiunissem. Avant la radunanza ha l'artist ed istoricher d'art, *Remo Alig*, Flem, guidà e declarà oraifer vid insaquants maletgs exponids las caracteristicas da quels dus stils.